

元史新編

元史卷四十九

列傳三十三

忠義一

元初及至元延祐至正間效忠者六傳

月里麻思乃馬氏初太宗命與斷事官忽都那同署後又同阿朮魯克達魯花赤破南宿州太宗十三年辛丑使宋議和從行者七十餘人馳抵淮上宋將以兵脅之降誘以官爵月里麻思曰吾持節南來以通國好反誘我以不義汝國既不懼亡吾豈懼死邪竝語同行者當仗義死毋辱君命皆慷慨不少屈宋將知其不可奪乃幽之長沙飛虎寨三十六年及伯顏兵渡江前使臣郝經自真州釋還而月里麻思已死不及生還世祖深悼之詔復其家以子忽都哈思爲荅刺罕給日廩忽都哈思自請從征宋以雪父恥帝嘉之授以上均州監戰萬戶至元十三年宋亡十八

年以招討使將兵征日本死於敵又有唐慶者太宗時爲國信使取金質子歲幣以金曹王來見帝於官山再往令金主黜帝號稱臣金主不從輒語侵之金君臣不能忍夜殺使者及從人於館和議遂絕此倚強凌弱自取殺身非行人之體君子無取焉

舊史唐慶專傳今附

石珪泰安新秦人宋徂徠先生守道之裔孫也材武倜儻金貞祐南渡兵戈四起珪率少壯保險與滕陽陳敬宗聚兵山東破張都統李霸王兵於龜蒙山宋將鄭元龍以兵迎敵珪敗之於毫陽遂乘勝引兵入盱眙會宋賈涉誘殺漣水忠義軍統轄季先人情不安眾迎珪爲帥歲戊寅太祖使葛不罕與宋議和己卯珪令麾下劉順直抵尋斯干城入覲太祖慰勞順且敕珪曰如宋和議不成吾與爾永

結一家庚辰宋果渝盟珪棄其妻孔氏子金山仗劍渡淮
宋將追之曰太尉迴完汝妻子珪不願宋將沈其妻子於
淮遂率順及李溫因孛里海歸木華黎木華黎承制授珪
濟兗單三州兵馬都總管山東路行元帥佩金虎符後金
棄東平珪與嚴實分據收輯濟兗沂滕單諸州癸未詔授
東平兵馬都總管山東諸路都元帥秋七月珪破曹州與
金將鄭從宜連戰數晝夜糧絕援兵不至珪臨陳馬仆被
禽囚至汴金主壯之誘以名爵珪憤然曰丈夫能一身受
封二國邪假我一朝當縛爾以獻金主怒烝殺於市珪怡
然就死色不變其麾下立社兗州祀焉子天祿孫興祖皆
襲千戶從伐金宋有戰功又李伯溫者大寧義州人長兄
惟則平陽征行萬戶次兄伯通死錦州張致之難伯溫襲

與金兵戰死

舊史石天祿李伯溫皆專傳今并附

攸哈刺

舊連拔都號

渤海人初名興哥世農家善騎射以武斷

鄉井金末避地大寧保高州富庶寨屢挫大軍木華黎率兵攻之寨破奔高州元兵圍城下令曰能斬攸興哥首以降則城中居民皆獲生守者召謂曰汝奇男子吾寧忍獻汝首汝其往降乎不然吾一城且無噍類攸興哥乃折矢出降諸將怒欲殺之木華黎曰壯士也畱之爲吾用俾隸麾下從攻通州獻計一夕造礮三十雲梯數十附城州將懼出寶貨以降木華黎命恣取之攸興哥獨取良馬三以賞兵士木華黎以其功聞太祖賜名哈刺拔都從木華黎略地燕南爲先鋒至大名金將徒單登城督戰攸哈刺射

之中左目其部將開門南奔追殺將盡論功賜金符充隨營監察戊寅授金虎符河東北路都元帥鎮太原時太原新破攸哈刺修城池繕兵甲招降屬邑市肆不改遠近來歸令軍中凡俘獲有親者聽贖無貨者官爲贖之民大悅辛巳三月金兵攻壽陽縣王胡莊垂破時左右裨將各分兵守險城中見卒不滿百攸哈刺夜半引甲騎十餘人救之金兵舉烽東西兩山攸哈刺趨之大戰天將明金兵遁去擣太原之虛獲其家屬攸哈刺聞之徑趨西山復奪以還五月金趙權府率兵三萬圍太原攸哈刺將騎三十出西門令騎曳柴揚塵聲言曰蒙古兵三萬至矣金兵懼潰去癸未太原諸邑皆平惟孟州陵井寨忻州清泉寨相脣齒皆未下甲申十月將兵至陵井遣卒叩寨門詐曰納糧

芻門啟徑入潰之餘寨皆降丁亥五月姦人夜獻太原東門於武仙仙引兵入攸哈刺鏖戰仙兵大至諸將自城外呼之出攸哈刺曰眞定史天倪平陽李守忠隰州田雄皆失守矣我又棄太原將何面目見主上及國王乎誓與城存亡遂歿於陳事聞命其長子芒兀台嗣鎮太原又潞州任志者歲戊寅歸木華黎於潞州授虎符充元帥收輯山寨數與金兵戰金嘗禽其長子如山以招之志親射殺其子赴木華黎大軍道經武安其縣已反爲金志死之子存亦戰死潞州又耶律忒末及子天祐以金都統降元會眞定將武仙之叛父子先後戰死舊史專傳今以其皆金降將也類附於此

合刺普華岳璘子也自唐至元世相高昌國十餘世至岳

璘隋兄歸附太祖事見元初文臣傳合刺普華幼習畏兀
書及經史記誦精敏李壇叛其母與敦氏攜季子脫烈普
華避地登萊聞音問隔絕合刺普華從從叔父撒吉思平
賊山東卒奉其母以歸撒吉思深器重之自謂其才不及
言於世祖召給宿衛嘗以事至益都於四腳山下置廣興
商山二冶以勞授金符爲商山鐵冶都提舉以職讓其弟
元兵南伐宋以行都漕運使帥諸翼兵萬五千主餽運江
南平上疏言親肺腑禮大臣以存國家之體興學校獎名
節以勵天下之士正名分嚴攷課以定百官之法通泉幣
卻貢獻以厚生民之本又言江南新附宜招舊族力穡通
商弛征薄入以撫馴其民不然恐煩後慮帝多采用其言
屬漕米二十萬緡邗溝達於河舟覆損十之一而又每斛

視都斛虧三升時阿合馬專政責償舟人合刺普華伏闕
抗言舟戶無罪苟朝廷必不任虧損臣獨當其辜詔勿治
阿合馬憤之出爲寧海路達魯花赤後改廣東都轉運鹽
使兼領諸番市舶時盜梗鹽法東莞香山惠州負販之徒
萬人爲亂江西行省命與招討使荅失蠻討捕之先驅斬
渠魁乃躬抵賊巢招降餘黨仍奏除鹽法之不便者劾按
察使脫歡姦利罷之羣盜歐南喜僭王號僞署丞相招討
眾號十萬因圖上其山川形勢及攻取之策三十餘條遂
與都元帥課伯海身宣慰都元帥白佐萬戶王守信等分
兵搃之未幾右丞梭都督兵征占城交趾屬護饗道比至
東莞博羅二縣界中遇劇賊歐鍾等橫絕石灣其鋒銳甚
合刺普華身先士卒且戰且行矢竭馬創徒步格鬪殺數

十人眾寡不敵爲所執賊欲奉之爲主不屈遂遇害是夕
其妻希召特勒氏夢其來告曰吾死矣知事張德劉閏亦
夢之二人相繼死而軍中往往見其乘騅督戰云後贈戶
部尚書諡忠愍子二人僕文質越倫質僕文質官至吉安
路達魯花赤贈宣惠安遠功臣雲中郡侯諡忠襄子六人
僕玉立僕直堅僕哲篤僕朝吾僕列篋五人皆第進士僕
哲篤官至江西行省右丞以文學政事稱於時越倫質子
善著僕哲篤子僕百寮遜善著子正宗阿爾思蘭皆相繼
登第一門世科之盛當代罕倫歐陽玄爲撰高昌僕氏家
傳又至元間死於叛藩之難有伯巴者舊作巴兒晃合丹氏
祖明里耶赤哥父脫倫闔里必事太祖太宗累有戰功伯
巴舊臣子孫於世祖時爲萬戶領諸部軍馬屯守謙州至

元十二年親王昔列吉脫鐵木爾叛奔海都伯巴以聞且願提兵往討未得命爲彼所襲死焉脫鐵木爾虜其二子曰八刺曰不蘭奚分置左右待之頗厚居歲餘八刺陰結其近侍謀報父仇謀泄將家族南奔至一河馬驚不能渡回拒追騎射中數人力窮就禽脫鐵木爾責之曰我待汝厚甚而汝反何邪八刺曰我誓殺汝以報君父之讐今力窮被執任汝所爲逼令跪不屈以鐵搗碎其膝終不屈兄弟同被害幼子何都兀赤官至河北河南道廉訪使

兒專傳
今并附

劉天孚字裕民大名人中書譯史爲東平總管府判官改都漕運司判官知冠州再知許州所至有治績時檢核屯田臨潁鄧艾口民稻田三百頃有欲害之者指爲右屯

陳於中書請復築之中書下天孚按實天孚爲辨其非章數上乃止襄城與葉縣接壤其南爲湛河襄城民食滄鹽葉縣民食解鹽刻石河南岸爲界葉縣令妄徙石於北二里誣其民食私鹽繫治百餘家兩縣鬪辯天孚爲攷正經界申中書葉令乃伏罪歲大旱天孚禱卽雨野有蝗俄爲羣烏啄盡明年麥熟時有青蠡食麥忽生大花蟲盡齧之許人立碑頌焉延祐閒知河中府視事始兩月時明宗封周王出鎮雲南行次延安陝西行省丞相阿思罕謀擁戴舉兵至河中時事起不虞天孚日夜治戰守具選丁壯分守要害令河東縣達魯花赤脫因都守大慶關津口盡收船舫東岸又遣官守汾陽守禹門守風陵等渡阿思罕軍列柵河西岸使來索舟天孚度不能拒凡八遣人至晉寧

乞援兵不報居七日阿思罕縛棧河上欲縱火屠城同知
府事鐵哥與河東廉訪副使明安荅見事急且患城中人
偏乃詣阿思罕軍阿思罕囚之而斂船濟兵兵既入城阿
思罕方坐府治號令諸軍天孚佩刀直前眾遏之不得進
退謂幕僚王從善等曰與其辱於賊吾寧蹈河以死遂拂
衣出時天寒河冰方堅天孚拔所佩刀斫冰開北望再拜
投水死阿思罕大怒籍其家郡人咸哀痛之事平召其弟
天惠給驛歸葬贈彭城郡侯諡忠毅

昔班帖木爾夫婦者蒙古人先是昔班帖木爾嘗爲趙王
位下同知怯憐口總管府事其妻嘗保育趙王及順帝至
正十八年趙王部落蔑里叛欲殺之昔班與妻謀以其子
觀音奴服王平日衣冠居王宮夜半夫妻衛趙王微服遁

去比賊至執觀音奴知其假王遂殺之而趙王竟得免事
聞詔授昔班同知河東宣慰司事其妻刺八哈屯雲中郡
夫人子觀音奴贈同知大同路事仍旌表其門閭

舊史見順帝本

紀今節取入忠義傳

忠義二

元未死於楚賊者七傳

伯顏不花的斤字蒼崖畏吾氏駙馬都尉中書丞相封高
昌王雪雪之孫駙馬都尉江浙行省丞相封荆南王朵爾
之子也好學曉音律初用父蔭同知信州路事又移建德
路會徽寇犯遂安伯顏不花將義兵平之又禽淳安叛賊
方清之以功遷本路總管至正十六年授衢州路達魯花
赤明年行樞密院判官阿魯輝引兵經衢州軍無紀律所
過輒大剽掠伯顏不花曰以官軍而爲民患此國賊也帥

兵逐之出境郡賴以寧擢江東道廉訪副使十八年十二月江西陳友諒遣賊黨王奉國等號二十萬寇信州明年正月伯顏不花自衢引兵援焉遇賊城東力戰破走之時鎮南王子大聖奴樞密院判官席閏等屯兵城中聞伯顏不花至爭開門出迎後數日賊復來攻伯顏不花大饗士約曰今日破賊不用命者斬乃部分諸將命阿速諸軍及民義爲左翼出南門高義范則忠將信陽一軍爲右翼出北門自與忽都不華將沿海諸軍爲中軍出西門因奮擊入賊營斬首數千級幾禽奉國適賊將突至官軍幾陷復勒兵力戰大破之二月友諒弟友德營於城東繞城植木柵攻益急又遣僞萬戶周伯嘉來說降高義潛與之通給忽都不華等謂與奉國相見則兵燬可解忽都不華信之

率則忠等十人往見奉國囚之不遣明日奉國令高義以計來誘伯顏不花時伯顏不花坐城上見義單騎來怒謂曰汝誘十帥無一人還今復來誘我邪數其罪斬之由是日夜鏖戰糧竭矢盡不少衰夏四月有大呼於城下者稱有詔來自江西招降伯顏不花曰如此乃賊耳吾大元臣子可受爾偽詔乎城存與存城亡與亡吾計之熟矣時軍民惟食草苗茶紙既盡乃至括資韉底掘鼠羅雀殺老弱以食五月大破賊兵六月奉國親來攻城晝夜不息者踰旬穴地百餘所或魚貫梯城而上伯顏不花登城麾兵拒之已而士卒力疲不能戰萬戶顧馬爾以其眾叛城遂陷席閏出降大聖奴及參謀海魯丁皆死之伯顏不花力戰不勝遂自殺其部將蔡誠盡殺妻子乃與蔣廣奮力巷戰

俱死之先是伯顏不花之援信州也嘗南望泣下曰我爲天子司憲視彼城之危急忍坐視乎吾知上報天子下拯生民餘皆無可恤所念者太夫人耳卽日入拜其母鮮于氏曰兒今不得事母矣母曰爾爲忠臣吾卽死復何憾鮮于氏太常典簿樞之女也伯顏不花因命子耶先不花奉其母閒道入福建以江東廉訪司印送行御史臺遂力守孤城而死朝廷賜諡曰桓敏

道童高昌人自號石巖性深沈寡言以世胄入官至正十一年以平章政事行省江西是年徐壽輝起斬黃平章圖堅理不花將兵捍江州旣而土寇蠡起道童素不知兵倉皇無所措用左右司郎中普顏不花言請撫州致仕左丞章伯顏至署商軍務以便宣使署本省左丞事專任調遣

乃與普顏不花設禦敵計甚悉明年正月武昌陷圖堅理
不花由江州遁還二月普顏不花將兵往江州至石頭渡
遇賊戰敗道童聞之大恐卽懷印遁走普顏不花還與章
伯顏定守城計後數日道童始自南昌民家來歸遂議分
門各守以備敵三月賊眾來圍城中置各廂官及各巷
長晝夜堅守眾心翕然而道童素恤民多爲之用賊圍城
凡兩月民無離志普顏不花密召死士數千面塗青額抹
黃布衣黃衣爲前鋒又別選精銳數千爲中軍而募助戰
者殿後命萬戶章安因卜魯哈台領之夜半開門伏柵下
黎明鉦鼓四面攻之賊驚爲神敗走遂乘勝擣其營復分
掃其餘黨皆任章伯顏普顏不花之功伯顏尋以疾卒朝
廷以道童捍賊有功加大司徒開府仍賜龍衣御酒及秋

命亦憐眞班爲江西行省左丞相火尼赤爲左丞同將兵來江西未幾亦憐眞班卒道童屬火尼赤平富瑞二州分鎮其地適歲大旱公私匱乏道童乃移咨江浙行省借米數十萬石鹽數十萬引與軍民約三日人糴官米一斗入昏鈔二貫又三日買官鹽十斤入昏鈔二貫民皆便之由是按堵如故賊不敢犯十八年夏四月陳友諒復攻江西城時火尼赤已遷平章行便宜事素與道童不相能且貪忍不得將士心見城且陷遂夜遁去道童退保撫州路欲集諸縣義兵以圖克復勢已不可爲遂爲賊害事聞賜諡

忠烈

自列傳移入

全普庵撒里字子仁高昌人初爲中書省檢校時太師汪家奴擅權用事臺諫無敢言者普庵撒里獨於眾中歷數

其過謬謬無懼色拜監察御史卽首劾汪家奴十罪乃見黜然氣益振歷詆權貴朝臣莫不畏慄出爲廣東廉訪使尋除兵部尙書未幾授贛州路達魯花赤發摘奸惡一郡肅然至正十一年潁州盜起卽修築城壘旬月守禦畢備募勇士三千人日練習之屬邑有爲賊所陷者遣兵復之境內悉安十六年以功拜江西行省參政分省於贛十八年江西下流諸郡皆爲陳友諒所據乃與總管哈海赤戮力同守友諒遣其將幸文才率兵圍贛使人脅降普庵撒里斬其使日攬甲登城拒戰凡四月兵少食盡義兵萬戶馬合某沙欲舉城降賊普庵撒里不從遂自剄事聞贈諡曰傲哀哈海赤守贛尤有功城陷之日賊將脅之使降哈海赤謂之曰與汝戰者我也毋殺贛民惟速殺我遂見害

又瀏陽周鏜者字以聲通春秋登泰定四年進士第授衡陽縣丞再調大冶縣尹抑豪強惠窮民治行爲諸縣最累遷翰林國史院編修官出爲四川儒學提舉便道還家無何湖南北盜起瀏陽無城守者皆驚竄賊至得鏜欲推爲主鏜瞠目厲聲罵賊死其同里謝一魯者鄉貢進士嘗爲

石林書院山長亦舉家死潭州之賊

舊史周鏜專傳今并附

聶炳字韞夫江夏人元統元年進士授同知平昌州事轉寶慶路推官至正十二年遷知荊門州纔半歲淮漢賊起荊門不守炳出募土兵得眾七萬復荊門又與四川行省平章交往復江陵旣而斬黃安陸之賊復振賊將俞君正合兵來攻荊門炳率孤軍晝夜血戰援絕城陷爲賊所執極口罵不絕賊以刃抉其齒盡乃斷左臂而支解之未幾

賊陷潛江縣達魯花赤明安達爾率勇敢出擊禽其僞將
進營蘆泆賊眾奄至出鬪死其家皆被害一子桂山海身
懷印綬去得免明安達爾唐兀氏字士元炳同年進士也
又茶陵劉畊孫字存吾至順元年進士授臨武縣尹建學
校歷建德徽州瑞州三路推官所至有聲至正十二年春
斬黃賊攻破湖南畊孫傾家募士以援茶陵賊至輒卻故
茶陵久不失守十五年轉寧國路推官歲饑勸振活者萬
計會長鎗賊鎖南班程述謝璽等攻寧國畊孫分守城西
南江浙行省遣援兵至則已疲而城恃有援不爲備賊夜
四鼓引眾緣堞而上城遂陷畊孫力戰遇害弟燾孫常寧
州儒學正湖南陷常寧長吏棄城走民奉印請燾孫爲城
守城賴以寧者一年外援俱絕死之長子碩爲武昌江夏

縣魯湖大使起義兵援茶陵亦死又沔陽州推官俞述祖
平江路管軍鎮撫守昱嶺關桂完澤湖廣行臺御史中丞
守饒州魏中立安陸知府丑閻竝以城守死於蘄黃之賊
是時賊旣陷湖廣分攻州郡官軍多疲懦不能拒所在無
賴子多乘閒竊發不旬日眾輒數萬皆短衣草屨木杷竹
鎗截緋帛爲巾襦彌野皆赤寶烏合不能戰而州郡望風
驚潰以至賊長驅如入無人之境其賢者又各以倉卒敗
死傳不勝傳故彙敘於此舊史劉駢孫俞述祖桂完澤
魏中立丑閻皆專傳今彙附

高昌孛羅

舊作孛羅帖木兒高昌人

字國賓由宿衛補官至襄陽路達

魯花赤至正十一年盜起汝潁均州鄖縣人田端子等亦

聚眾殺官吏孛羅將民兵捕斬之未幾行省廉訪司同檄

孛羅以其所領兵會諸軍於均房同討賊賊始退而穀城

光化以急告卽帥兵趨穀城而分遣樊城主簿脫因等趨光化且使求糧於襄陽不應遣同知耶先不花促之又不應軍乏食不能行乃駐於柴店復遣從子馬哈失力往告詞甚苦切廉訪分司王僉事本路總管柴順禮怒其責望械之適紐眞來獻光化所獲首級且言孛羅在穀城與賊相持未知存歿宜急濟其糧少緩恐弗及矣於是脫二人械遣還而命耶先不花率數千人會孛羅討賊明年正月襄陽失守耶先不花等聞之驚潰孛羅領義兵二百且戰且行至監利縣遇沔陽府達魯花赤交往同知三山安陸府同知燕只不花荆襄提舉相哥失力之師時濱江有船千餘乃糾合諸義兵丁壯水工五千餘人署以軍號給以刀稍具哨馬五十水陸繼進比至石首縣聞中興路亦陷

乃議趨岳州就元帥帖桀而道阻不得前仍趨襄陽賊方駐楊湖港乘其不虞擊之獲船二十七生禽賊黨劉交兒訊得其情進次潛江又斬賊數百級獲三十餘船梟賊將劉萬戶許堂主等是日甫止兵未食而賊大至與戰抵暮交住等軍各當一面不能救孛羅被重創磨馬哈失力使去曰吾以死報國汝無留此馬哈失力泣曰死生從叔父既而孛羅被執賊請同爲逆孛羅怒罵之遂遇害馬哈失力帥家奴求其尸復與賊戰俱歿於陳舉家死者凡二十六人又卜理牙敦者山南廉訪使治中興至正十二年斫黃賊來犯與前判官上都皆力戰被執不屈死

卜理牙敦舊史專傳

附今并

湖海札刺台氏靖安縣達魯花赤至正十二年斫黃賊起

潮海與縣尹黃紹同集義兵禦賊未幾賊數萬來寇紹赴
行省求援潮海獨率眾戰象湖大破之乃起進士胡斗元
塗淵舒慶遠甘棠等謀畫而以勇士黃雲爲前鋒自二月
至於八月戰屢捷禽賊將洪元帥而賊黨益盛黃雲戰死
我軍挫衄潮海遂被圍尋爲賊所執死於富州子民安圖
襲父職爲本縣達魯花赤十三年帥眾敗走賊將復縣治
十四年賊兵復至民安圖迎戰力竭賊執而高之紹字仲
先臨川人登至正八年進士第以求援出靖安而道阻絕
遇官軍護之得入龍興而龍興亦被圍其後圍解紹乃與
民安圖招諭叛境過建昌之高坪遇賊紹與戰不勝正衣
冠罵賊死之斗元字元浩靖安人至正十年領江西鄉薦
第一賊至靖安斗元以鄉兵擊敗之入縣治與潮海共圖

戰守及潮海被執賊脅之使降斗元罵不屈乃以土埋其腰不死又縛置暗室斗元仆牆以出逃入深山狂罵而死黃雲撫州人寓靖安素以勇捷稱每接戰獨以身當敵嘗爲數十人所圍卽奮勇躍出至是身中數十槍噴血罵賊而死

汪澤民字叔志徽之婺源州人宋端明殿學士藻之七世孫也擢延祐五年進士第授同知岳州路平江州事以母年八十上書願奪所授官一等或二等得近地以便養不允南歸奉母之官州民李氏以貲雄誣其孀弟婦以奸事將據有其財獄成而澤民至卒雪之會朝廷徵江南包銀府檄澤民分辨民不擾而事集尋遷南安路總管府推官鎮守其戶多爾赤持官府短長其黨王甲爲府史毆傷縣

令訴郡同僚畏多爾赤之勢不敢申理澤民獨捕甲繫之
獄多爾赤賂巡按御史欲出之澤民正色與辨御史沮怍
乃卒罪王甲潮州府判官錢珍以奸淫事殺推官梁楫事
連廣東廉訪副使劉珍坐繫者二百餘省府凡六委官鞠
問皆顧忌淹延弗能白復檄澤民識之獄立具改平江路
總管府推官有僧淨廣與他僧有憾久絕往來一日邀廣
飲廣弟子急欲得師財且苦其筆楚潛往他僧所殺之明
日訴官他僧不勝攷掠誣服三經審錄詞無異結案待報
澤民取行凶刀視之上有鐵工姓名曰工問之乃其弟子
刀也一訊吐實卽械之而出他僧人罵以爲神調濟寧路
兗州知州建議行聖公襲封職僅三品宜進其品秩以示
崇聖之意廷議從之至正三年除國子司業與修遼金宋

史書成遷集賢直學士未兩月卽移疾致仕歸十五年蘄黃賊犯宣州城中兵不滿數百江東廉訪使道童雅重澤民日就之詢守禦計城得無虞明年長槍賊鎖南班等叛來寇城或勸澤民去澤民曰昔江萬里寓鄱陽大軍偏城不隨眾走況軍民離合視吾去畱吾何忍去父母之邦乎畱不去凡戰鬪籌畫多澤民參決之屢敗賊兵旣而寇益眾城陷被執罵賊遇害年七十事聞贈江浙行中書省左丞追封譙國郡公諡文節宋濂碑其神道舊史在列傳今移入

忠義三

元未死淮浙之難者六傳

李齊字公平廣平人家甚貧客於江南工辭章元統元年進士第一歷僉河南淮西廉訪司事移知高郵府有政聲至正十年盜突入府驛取十二馬去齊躬追殺之十一年

州人秦觀保造兵仗將圖劫掠復獲誅之十三年秦州白
駒場亭民張士誠破秦州河南行省遣齊往招降被拘久
之賊酋自相殺始縱齊來歸秦州平賊徒尙彙聚士誠復
鼓變殺參政趙璉掠官庫民財走入得勝湖俄陷興化縣
行省以左丞僕哲篤偕宗王鎮高郵使齊出守暨社湖夏
五月乙未數賊入城一譟呼而省憲官皆遁齊急還救城
賊已閉門拒守遂連興化接得勝湖舟艦四塞蔓入寶應
縣已而有赦詔至高郵不得入賊給之曰請李知府來乃
受命行省強齊往至則下齊獄中齊益辨說士誠本無降
意特遷延爲繕飭計官軍謀知之乃進攻城士誠呼齊使
降齊叱曰吾膝如鐵豈爲賊屈士誠怒扼之跪齊立而詬
之乃曳劍搥碎其膝而局之論者謂大科三魁若秦不華

沒海上李黼隕九江汨齊之死皆不負所學云同死趙璉
者字伯器宏偉之孫也至治元年進士第屢遷杭州路總
管強毅開敏杭人碑其政績會朝廷命李齊招諭士誠乃
移璉以參知政事鎮秦州璉方治戈船趨濠泗士誠疑憚
不敢發又覘知州城無備遂夜四鼓復反襲城璉力戰墜
馬被執又盛昭者字克明歸德人官淮南行省照磨行省
遣入高郵授士誠官不受被拘皆罵賊死趙璉盛昭舊史
專傳今并附
石普字元周徐州人至正五年進士授國史院編修官改
經正監經歷淮東西盜起朝廷方用兵普以將略薦丞相
脫脫討徐州以普從行徐平錄功遷兵部主事尋遷樞密
院都事從樞密院官守淮安時張士誠據高郵普詣丞相
面陳破賊之策且曰高郵負重湖之險地皆沮洳騎兵莫

能前與普步兵三萬保取之高郵既平則濠泗易破請先驅爲天下忠義倡丞相壯之命權山東義兵萬戶府事招義勇萬人以行而汝中柏者方用事陰沮之減其軍半初令普便宜行事及行又使聽淮南行省節制普行次范水砦日未夕趣軍中具食夜漏三刻下令銜枚趨寶應其營中更鼓如平時抵縣卽登城樹幟城賊驚潰因安撫其民諸將忌普功始水陸進兵乘勢拔十餘砦斬賊數百將抵高郵城分兵三隊一趨城東備水戰一爲奇兵虞後路普自將攻北門遇賊與戰賊不能支遁入城普先士卒躡之縱火燒關門賊懼謀棄城走而援兵按不進有蒙古軍千騎突出普軍前欲收先入功賊以死捍蒙古軍恇怯卽馳回遂爲賊所蹂踐墜水中普軍亦亂賊乘之普勒餘兵血

戰良久仗劍大呼曰大丈夫當爲國死有不進前者斬奮
擊直入賊陳中從者僅三十人至日西援絕被創墜馬復
步戰數合左脅爲賊鎗所中猶手握其鎗斫賊死賊眾攢
鎗以刺普普與從者皆力戰死之

納速刺丁字士瞻其父馬合木從征襄陽以勞擢濬州達
魯花赤因家大名納速刺丁起身鄉貢進士辟掾淮東宣
慰司至正十年以民兵襲真州賊有功已而泰州賊大起
鎮南王府宣慰司請參議軍事納速刺丁建議築四城立
外寨捷堤穿河募兵與賊抗行省檄其提戰艦六十海舟
十四上下巡捕以固江面且設蒙古軍五百往江寧道遇
賊斬擊二百餘級遂抵龍潭而還未幾出邏江上奪賊火
船二百賊遁走俄復據龍潭口又擊走之追斬三百餘級

其子寶童禽賊首及其號旗捷聞賞賚優渥召還真州南
行臺檄使援蕪湖及主賊船已薄岸遂三分戰艦縱擊之
賊奔潰俘斬甚眾賊不得渡江者多納速刺丁之功也秦
州賊李二起行省移之捍高郵得勝湖賊船七十餘柁乘
風而來卽前擊之焚其二十餘船賊潰去李二失援遂降
其黨張士誠殺李二復爲亂戕參政趙璉入據興化而水
陸襲高郵屯兵東門納速刺丁以舟師會諸軍討之距三
朶鎮麾兵挫賊前鋒後賊鼓譟而前乃發火箭火鏃射之
死者蔽流而下賊繚船於背盡力來攻而阿速衛軍及真
滁萬戶府等官見賊勢急皆遁去納速刺丁顧必死謂其
三子寶童海魯丁西山奴等速走寶童等不肯去遂皆死
之事聞贈納速刺丁淮西元帥府經歷又樊執敬者鄆城

人以江浙行省參政督海運於平江舟將發海口爲海寇劫糧以去俄守杭州昱嶺關賊至城陷騎馬奮力斫賊死

樊欽徵舊史專傳今并入

褚不華字君實隰州石樓人沈默有器局泰定初補中瑞司譯史授海道副千戶連拜南臺西臺監察御史遷淮東廉訪副使汝穎盜發勢張甚不華行部至淮安極力守禦多所斬獲且請知樞密院老章判官劉甲守韓信城相犄角復劾諸將逗撓之罪擢廉訪使劉甲有智勇與賊戰輒勝賊憚之號曰劉鐵頭不華頗賴之總兵者聞不華劾己益恚嫉乃檄甲別將共擊賊冀以困不華甲去韓信城陷賊乃掘塹相銜捷水寨以合圍旣而天長青軍叛普顏帖木爾所統黃軍復叛賊皆挾之來攻不華知事危退入哈

刺章營賊稍引去乃出抵楊邨橋賊奄至殺廉訪副使不
遠十里不華以餘兵入淮安時城之東西南三面皆賊惟
北門通流陽阻赤鯉湖爲賊據流陽之路又絕賊計孤城可
倚其芻餉而赤鯉湖爲賊據流陽之路又絕賊計孤城可
取進柵南鎖橋不華與元帥張存義出大西門會僉事忽
都不華兵突賊柵殊死戰賊敗走追北二十餘里城中食
且盡元帥吳德琇運糧萬斛入河爲賊所掠賊與青軍攻
圍日益急總兵者屯下邳相去五百里按兵不出凡遣使
十九輩告急皆不聽城中餓者仆道上卽取啖之草木螺
蛤魚蛙燕鳥及鞞皮鞍韉革箱敗弓之筋皆盡徹屋爲薪
人多露處坊陌生荆棘力盡城陷不華猶據西門力鬪中
傷見執爲賊所斃次子伴哥冒刃護之亦見殺時至正十

六年十月乙丑也不華守淮安五年殆數十百戰精忠大節人比之張巡云朝廷聞之贈翰林學士承旨衛國公諡忠肅

月魯不花字彥明蒙古遜都思氏太祖四傑功臣赤老溫次子納圖爾之玄孫也生而容貌魁偉咸以令器期之未冠父脫帖木爾以千戶戍越因受業於韓性試江浙鄉闈中第一方揭曉試官夢月中有花象已而果符其名登元統元年進士第至正中除吏部員外郎奉命至江浙糴粟二十四萬石至則第戶產之高下以爲糴之多寡不擾而事集旣而軍餉不給又奉命出糴於江浙召父老諭之不踰月糧事以畢太師石丞相脫脫南征辟從軍事督饋餉尋拜監察御史首上疏言郊廟禮缺天子宜躬祀南郊殷

祭太室皇太子天下之本當簡老成重臣爲輔導以成其德選吏部侍郎有建議欲於河閒長蘆置局造海船三百者卽上書中書省言其非便忤議者遷工部侍郎後分部彰德道過河閒民遮擁拜謝曰微公言吾民其斃矣會除保定路達魯花赤保定歲輸糧數十萬石於新鄉苦弗便月魯不花請輸京倉以恤之俄除吏部尙書保定父老百數詣闕乞畱監郡以撫吾民遂以尙書仍知郡事會賊北渡河日修城浚濠爲戰守具廷議發五省八衛兵出戍外鎮月魯不花疏請畱其兵護本郡遂兼統黑軍數千人及團結西山十二寨民人軍勢大振賊再侵境皆敗去召還爲詳定使保定民不忍其去繪像祀之去保定一月而城陷朝廷以月魯不花素負民望令入城招諭之抵城賊閉

關不出改大都路達魯花赤轉吏部尙書會劇賊程思忠據水平堅壁不下詔月魯不花招撫之眾悉難其行月魯不花毅然竟入城諭賊賊皆感泣羅拜納降還遷翰林侍講學士拜江南行御史臺中丞乃由海道趨紹興旣而除浙西廉訪使會張士誠據浙西僭王號度弗可與竝處令具舟載妻子而匿身木櫃中蔽以槩秸脫走至慶元士誠部下覺之遣百騎追至曹娥江不及而反俄改山南道廉訪使浮海北而往道阻還抵鐵山遇倭賊船甚眾乃挾同舟人力戰拒之倭賊給言投降弗納於是賊卽登舟攫月魯不花令拜伏月魯不花罵曰吾朝廷重臣寧拜賊耶麾下家奴擲海刺殺首賊遂與次子樞密院判官老安姪百家奴皆死之同舟死者八十餘人事聞贈遼陽行省平章政

事諡忠肅

自列傳
移入

達識

舊連帖
睦遜號

字九成康里托托子也幼與其兄塔識俱入

國學爲諸生讀經史悉能通大義初以世胄補官至正九年遷湖廣平章沅靖柳桂等路獠獠竊發達識請置三分省一治靜江一治沅靖一治柳桂以左右丞參政分兵鎮其地已而諸獠獠悉降召還復爲大司農十一年台州方國珍起海上奉詔與浙東宣慰使秦不華同往招諭之屢遷江浙行省左丞相許便宜行事時江淮盜勢日盛南北道梗達識獨治方面而任用非人通賄鬻爵謗議紛然所部郡縣往往淪陷十六年正月張士誠陷平江七月逼杭州達識棄城走富陽萬戶普賢奴力拒之而苗軍帥楊完者時駐嘉興亦引兵至擊走士誠初達識引完者爲江浙

右丞而苗軍素無紀律所過抄掠蕩然淫虐無人理喜則人怒則獸無論貴家命婦室女必圍宅勒污信宿始得縱還否則指以通賊縱兵屠害民間謠曰死不怨秦州張生不謝寶慶楊而達識方倚完者軍爲重莫敢禁遏故其軍日肆明年士誠寇嘉興屢爲完者所敗士誠乃遣蠻子海身以書詐降而書詞多不遜完者欲納之達識不可完者固勸乃許之士誠始要王爵不許又請爵爲三公達識遂承制授士誠太尉其弟士德士信及其黨皆授官有差於是朝廷以招安張士誠爲達識功詔加太尉時徽州建德皆已陷完者屢出師不利士誠素欲圖完者而完者時又強娶平章慶童女且縱兵淫掠達識久厭苦之乃陰與士誠合謀令以兵除之揚言使士誠出兵復建德完者營於

杭州不爲備遂被圍苗軍潰完者盡殺所有婦女數十人而後死士誠兵遂據杭州達識徒存虛名而已俄而士誠令其部屬自頌功德必欲求王爵達識不得已以聞於朝再三不報士誠遂自立爲吳王徙達識至嘉興逼取其符印峻垣錮門守之又使人至紹興從御史大夫普化帖木爾索行臺印普化封印置庫中曰我頭可斷印不可與又迫之登舟曰身可死義不可辱也從容沐浴更衣與妻子訣賦詩二章仰藥死臨死擲杯地上曰我死矣逆賊當踵我亡也後數日達識聞之歎曰大夫且死吾不死何爲遂進藥酒飲之而卒士誠乃使載其柩及妻孥北返於京師普化字遷善荅魯乃蠻氏行臺御史大夫帖木哥子也論者以爲其死視達識爲差勝云

自列傳移入

元史卷四十九 列傳

五

忠義四

元末死明兵者八傳

普顏不花字希古蒙古氏倜儻有大志至正五年由國子生登右榜進士第一人授翰林修撰十一年遷江西行省左右司郎中斬黃賊徐壽輝來寇普顏不花戰守功爲多語在道童傳十六年轉山東行中書參政十八年詔與治書侍御史李國鳳同經略江南至建寧江西陳友諒遣鄧克明來寇而平章政事阿魯溫沙等皆夜遁國鳳時分鎮延平城陷遁去普顏不花命築各門甕城前後拒戰六十四日旣而大敗賊眾明年召還授山東宣慰使再轉知樞密院事平章山東行省守禦益都明兵壓境將眾捍城力戰城陷而平章保保出降普顏不花還拜母趨官舍坐堂上主將素聞其賢召之再三不往旣而面縛之普顏不花

不屈死先是其妻阿魯眞瑟呼家人告以殉死而二弟婦已各抱幼子及婢妾溺舍南井死井填咽不可容遂抱子投舍北井其女及妾女孫女皆隨溺焉是時有申榮者平章山東行省守東昌見列郡皆降告其父曰人生世間不能全忠孝者兒也父曰何爲榮曰城中兵少不敵戰則萬人之命由兒而廢但有一死報國耳遂自經

福壽唐人幼俊茂知讀書尤善應對既長入備宿衛屢遷同知樞密院事至正十一年潁州賊起時車駕在上都朝廷皆欲驛奏待命福壽謂俟得請還則事必無及決議調兵五百遣衛官哈刺章忻都怯來討之而後以聞明年改耶可札魯忽赤未幾出爲淮南行省平章是時濠泗俱已陷師久無功福壽至議築石頭斷江面守禦有方眾恃

以固十五年遷江南行臺御史大夫先是集慶嘗有警阿魯輝以湖廣平章將軍來援事平其軍鎮揚州苗軍無紀律日事殺虜俄并殺阿魯輝以叛高郵廬和等州相繼淪陷集慶勢日孤且倉庫無積蓄人心日震恐福壽乃使民兵自守勸餉激士明兵圍集慶福壽盡閉諸門獨開東門數出戰勢不能支城遂破福壽獨據胡牀坐鳳凰臺下指麾左右或勸之去叱曰吾爲國家重臣與城存亡去將安往達魯花赤達尼達思見其獨坐亦從畱弗去俄而亂兵四集皆死之又同時死者有治書侍御史賀方字伯京晉寧人以文學名事聞贈福壽江浙行省左丞相衛國公

諡忠肅

自列傳移入

閔本字宗先河內人刻志於學早歲得推擇爲禮部令史

御史大夫不花辟爲掾平反冤獄甚有聲拜監察御史五
轉爲吏部尙書移刑戶二部皆以能見稱授集賢侍講學
士明兵薄京師本乃朝服與妻程氏北向再拜大書於屋
壁曰元中奉大夫集賢侍講學士閔本死此遂各縊焉二
女亦自縊其旁有拜住者康里人也字聞善以材累官至
太子司經明兵至謂家人曰吾始祖海藍伯封河東公與
太祖同事王罕太祖取王罕收諸部落吾祖引數十騎馳
西北方太祖使人追問之曰昔者與皇帝同事王罕王罕
今已滅欲爲之報仇則帝乃天命欲改事帝則吾心有所
不忍故避之於遠地以沒吾生耳吾祖生沙漠其言尙如
此今吾生長中原讀書國學而不知大義乎遂赴井死家
人瘞之舍東悉焚書籍爲殉云

趙弘毅字仁卿真定晉州人少好學家貧無書僂於巨室
晝則爲役夜則借書讀之嘗受經於臨川吳澄始辟翰林
書寫再轉爲國史院編修官調大樂署令民兵入京城弘
毅與妻解氏皆自縊其子恭中書管句與妻子訣曰今乘
輿北奔吾父母已死尙何敢愛死乎或止之曰我曹官卑
何自苦若此恭叱曰忠義人各盡豈問職之崇卑乎遂公
服北向再拜就縊死恭女官奴年十七亦自經以殉

朴賽因不花字德中肅良合台人有膂力善騎射累官至
嶺北行省右丞平章政事會皇太子撫軍冀寧承制拜中
書平章政事明兵逼京師詔守順承門所領僅數百羸卒
歎息謂左右曰國事至此吾但知與此門同存亡也城陷
被執不屈死之是時有張庸者字存中溫州人性豪爽精

太乙數會世亂以策干經略使李國鳳承制授庸福建員外郎治兵杉關頃之計事赴京師因進太乙數圖順帝喜之擢祕書少監皇太子立大撫軍院命庸團結房山除刑部尙書仍領團結會諸寨既降庸守駱駝谷遣從事段禎求援於擴廓不報庸獨堅守拒戰眾將潰庸無去志已而寨民李世傑執庸出降與禎同被害

丁好禮字敬可真定蠡州人精律算初試吏於戶部辟中書掾屢遷京畿漕運使建議置司於通州講究漕運利敝著爲成法人皆便之除戶部尙書時國家多故財用空乏好禮能撙節浮費以給國用至正二十年拜中書參政時京師大饑天壽節廟堂欲用故事大饗會好禮言今民父子有相食者君臣當修省以弭大患讌會宜改常度不聽

遂乞致仕家居擴廓從皇太子還京輸山東粟以遺朝貴
餽好禮麥百石不受二十七年復起爲中書平章政事尋
以議論不合謝政去特封趙國公明兵入京城大帥召之
不肯行昇至齊化門抗辭不屈而死年七十五是日中書
參政郭庸亦昇至齊化門眾叱之拜亦不屈死庸字允中
蒙古氏由國學生釋褐出身屢遷爲陝西行臺監察御史
與同列劾知樞密院事耶先帖木爾喪師左遷中興總管
府判官其後耶先以罪黜召拜監察御史累轉參政中書
其節義與好禮竝稱云

柏帖穆爾字君壽蒙古人家世履歷無攷居官所至著廉
能至正中累遷福建行省左右司郎中二十七年明騎兵
出杉關取邵武以舟師由海道趨閩奄至城下柏帖穆爾

知城不可守引妻妾坐樓上慷慨謂曰丈夫死國婦人死夫義也今城且陷吾必死於是若等能吾從乎皆泣曰有死而已無他志也縊而死者六人有十歲女度其不能自死則紿之曰汝稽顙拜佛庶保我無恙也甫拜卽挈米囊壓之死乳媪抱其幼子旁立以泣柏帖穆爾熟視歎曰父死國母死夫妻與女從父者也皆當死汝三歲兒於義何所從乎爲宗祀計可也乃命媪抱匿旁近民舍而斂金珠畀之曰卽有緩急可以此贖兒命有頃兵入城卽舉鎧自然四圍窗火大發遂焚死

迭里彌寶字子初回回人性剛介事母至孝年四十猶不仕或問之曰吾不忍舍吾母以去也以宿衛年勞授行宣政院崇教三遷爲漳州路達魯花赤居三年民甚安之時

陳有定據全閩八郡之政皆用其私人以總制之朝廷命官不得有所與明兵既取福州興化泉州皆納款亡何吏走白招諭使者至請出城返之迭里彌實從容語之曰爾第往吾行出矣乃詣廳事具公服北面再拜畢引斧斫其印文又大書手版曰大元臣子卽入位端坐拔所佩刀割喉中以死既死猶手執刀按膝坐儼然如生郡民相聚哭庭中斂其尸葬東門外時又有獲獨步丁者回回人前進士累官僉廣東廉訪司事有呂復者爲江西行省左右司都事皆閑居寓福州以行省命攝長樂縣尹福州旣下獲獨步丁曰吾兄弟三人皆忝進士受國恩四十年今雖無官守然大節所在其可辱乎以石自繫其腰投井死復亦曰吾世食君祿今雖攝官若不以死報國則無以見先人

於地下引繩自經死獲獨步丁之兄曰穆魯丁者官建康
曰海魯丁者官信州先後皆死國難云

忠義五

元末死河南遼陽
山東閩粵者八傳

張桓字彥威真定橐城人父木知汝寧府因家焉桓以國
子生釋褐屢遷陝西行臺監察御史以言事不合去未幾
汝寧盜劉福通兵起桓避之確山賊久知桓名襲獲之羅
拜請爲帥弗聽囚六日擁至渠魁前桓直趨據榻坐與之
抗論逆順賊徒摔桓起跪桓仰天大呼詈叱且屢唾賊面
賊猶不忍殺謂桓曰汝但一揖亦恕汝死桓瞑目曰吾恨
不斬汝首反爲汝折腰邪賊知終不可屈遂刺之年四十
八賊後語人曰張御史真鐵漢害之可惜事聞贈禮部尙
書諡忠潔

郭嘉字元禮濮陽人祖昂父惠俱以戰功顯嘉登泰定三年進士第屢遷監察御史會朝廷以海寇起欲於浙東溫台慶元等路立水軍萬戶鎮之令嘉乘驛至慶元與江浙行省會議可否嘉至首詢父老知其弗便請罷之會方擇守令綏靖遼東乃授嘉廣寧路總管兼諸奧魯勸農防禦屬盜起軍旅數興供餉無虛日民苦和糴轉輸而吏胥得因時爲奸嘉設法計其戶口第其甲乙民甚便之有詔團結義兵嘉招集民數千教以坐作進退千百夫各統以長號令齊一賞罰明信故富強爲東方諸郡最十八年劉福通賊黨關先生等由大同陷上都嘉率義兵出禦旣而遼陽陷嘉將眾巡邏去城十五里遇青號隊五百餘人給言官軍嘉疑其詐俄果脫青衣變紅嘉分兵兩隊夾攻之生

禽賊數百死者無算然賊勢日熾孤城無援乃集同官議
攻守計竭家所有衣服財物犒士頃之賊至圍城互數十
里有大呼降者嘉挽弓射殺之賊稍引退嘉遂開西門逐
之賊大至力戰死事聞贈太原郡公諡忠烈

周喜同河西人初爲後宮衛士眾稱其才選充承徽寺經
歷再調南陽縣達魯花赤居二歲妖賊起陷鄧州人情洶
洶俄而賊鋒抵南陽南陽無城無兵賊入之若虛邑喜同
以計獲數賊詰之云賊將大至悉斬之以安眾心晝夜督
丁壯巡邏守備時大司農錢木爾以兵駐諸葛庵爲賊襲
死賊遂乘銳取南陽喜同守西門望見賊勢盛卽與家人
訣已而城中皆吳喜同策厲義兵連日再戰殺賊數百賊
知無援攻益急城遂陷喜同突圍賊橫刺其馬馬蹶喜同

鞭馬躍而起手斬刺馬者俄爲他賊追及身被數創遂見
執爲所殺妻邢氏聞喜同戰死帥家僮數人出走遇賊奪
賊刀斫之且罵且前亦見殺一家死者二十餘人贈南陽
路判官時襄陽錄事司達魯花赤塔不台字彥暉者元統
元年進士魏王軍汝亳塔不台來供餉魏王嗜酒輕戰備
一夕賊劫王王臥不能起爲所執塔不台馳騎奪王亦爲
賊所得比明見賊酋王拜乞活塔不台以足蹴王曰猶欲
生乎賊復屈其拜塔不台拒而詬之且與縛者角遂支解
死

王英字邦傑益都人性剛果有膂力善騎射襲父職爲莒
州翼千戶父子皆善用雙刀人號之曰刀王至元二十九
年江西行樞密院命討南雄賊元貞元年從左丞董士選

討太山賊二年討永新安福二州賊皆平之延祐二年寧都賊起行省命英率各萬戶軍討之屢戰皆勝行省平章李世安遣英返江浙平章張閻所領軍於閩境至上虎嶂遇賊三千餘人盡殲之至治元年以大臣薦授忠武校尉益都淄萊萬戶府副千戶天厯元年授宣武將軍至順二年行省命英招捕桂陽州賊張思進等二千人相率請降元統元年授懷遠大將軍同知海北海南道宣慰使司事後至元三年平萬安軍賊吳汝期等三千人未幾李志甫起漳州劉虎仔起潮州詔江西行省右丞燕帖木爾討之時英已致仕平章伯撒里謂僚佐曰是雖鼠竊狗盜非刀王行不可乃使迎致之英曰國家有事吾雖老可坐視乎據鞍橫槊精神飛動馳赴焉及賊平英功居多至正中毛

貴陷蓋都英時年九十有六乃謂其子弘曰我世受國恩
今老矣縱不能事戎馬以報天子尚忍食異姓粟以求生
乎水漿不入口者數日遂卒毛貴聞之使具棺衾以葬將
斂舉其尸不動焚香祝曰公子弘請公歸葬先塋祝畢尸
遂起觀者莫不驚異山東宣慰使普顏不花及憲司請卹
典於朝有曰不食寇粟餓死芹泉有夷齊之風爲臣之清
者也芹泉谷名英所居也

自列傳
移入

彭庭堅字允誠溫州瑞安人擢至正四年進士第授同知
沂州事毀牛皇神祠驅鄰郡上馬賊免民橫急征斂民甚
便之俄以平反獄囚忤上官意遂棄去十年詔選守令以
建寧路崇安縣尹起庭堅於家屬鉛山寇周良竊發犯閩
關庭堅禦之有法寇不入境十一年同知建寧路總管府

事江西寇熾庭堅率民兵克復建陽又進兵平浦城十二年攝僉都元帥府事與邵武路總管吳按攤不花夾攻邵武庭堅設雲梯火礮晝夜搏擊寇遁追斬渠凶邵武悉平總兵官江浙參政章嘉上功於朝升同知福建道宣慰使司副都元帥鎮邵武冬寇陷建寧十三年庭堅統兵次秦寧寇懼請降復建寧還師邵武十四年盜侵政和松溪江南行臺中丞吳鐸檄庭堅赴援時麾下萬戶岳煥素悍縱卒爲暴庭堅繩以法煥懼使部卒乘不備詐爲賊兵突入營眾潰庭堅獨留不去遂遇害年四十三故吏張椿儒士夏志行江晃奉柩還崇安民哀泣如喪父母立祠祭禱數降靈響旁邑立祠亦如之南行臺監察御史余觀行部巡察獲其賊斬之爲上其事贈福建道宣慰使都元帥封忠

愍侯

元史卷四十九

五

王伯顏字伯敬濱州霑化人至正九年知福寧州居三歲大著威惠遷福建鹽運副使將行會鄰境賊警州父老數百詣憲府乞畱伯顏仍領州事從之乃與監州阿撒都刺令民丁分掘險要各自爲守而自練壯士千五百人備戰賊柵楊梅嶺伯顏與子相馳破之是秋賊自邵武閒道迫福寧賊帥王善擁眾萬餘直壓州西門眾寡不敵士卒奔潰伯顏惟率麾下百十人奮身射賊俄馬中流矢墜地遂見執善聞伯顏政聲欲使爲州尹伯顏訶叱之左右搯以跪弗屈遂毆之伯顏嚼舌出血嘆善面罵曰反賊殺卽殺何以毆爲吾民天民也汝不可害大丞相親討叛逆百萬之師雷擊電掃汝輩小醜將無遺種顧敢爾邪賊亦執阿

撤都刺至善厲聲責其拒鬪噤不能對伯顏復唾善曰我
與監州殺賊何言拒耶我死必爲明神以滅汝言訖挺頸
受刃頸斷不僵出血皆白死數日而色如生州人哭聲連
巷子相亦被執賊欲官之相詈曰汝吾君父之仇義不戴
天恨不寸斬汝賊復殺之相妻潘氏挈二女爲賊所獲亦
罵賊母子同死伯顏旣死賊時睹其陳兵出入明年州有
僧林德誠者起兵討賊乃望空拜禱曰王州尹宜率陰兵
助我破賊時賊正祠神覩紅衣軍來以爲僞帥康將軍亟
往迎之無有也四面皆青衣官軍賊大駭敗走斬其酋江
二蠻福寧遂平事聞贈濟南路總管上輕車都尉太原郡
侯陳高狀其行

見不繫舟漁集

劉濟字濟川其先興州人曾祖海金進士第一仕至河南

府尹死國難子孫遂家河南濬由廉訪司書吏調連江縣
寧善鄉巡檢至正十三年江西賊帥王善寇閩官軍守羅
源縣與連江接壤勢將迫濬妻真定史氏故相家女也有
才識謂濬曰事急矣可聚兵以捍一方盡出篋中物募壯
士百餘命仲子健將之浹旬至數萬賊尋破羅源分兩道
攻福州濬拒之辰山三戰三捷俄聞福州陷眾多潰去濬
獨帥健兵進遇賊於中麻突其陳斬前鋒五人賊兵大至
鏖戰三時頃濬中箭墮馬健下馬掖之俱被獲濬忿戟手
大罵賊縛之墜下先斫手指罵彌厲再斫一指亦如之
指且盡斫兩腕次及兩足濬色不少變罵聲猶不絕遂割
其喉舌而死健亦以死拒賊善義之舍健使斂濬屍瘞之
健歸請兵於帥府以復父仇弗聽遂盡散家貲結死士百

人詐爲工商流勾入賊中夜半發火大譟賊驚擾自相屠戮健手刃其殺父者并禽脅及寇首陳伯祥來獻磔之事聞贈濬福建行省檢校官授健古田縣尹官爲濬立祠福州北門外

多里不花

多舊作朱

字端甫蒙古人始爲宿衛官累歷顯要拜

江西行省平章政事與平章阿爾渾沙等分道討陳友諒遂泛海南下趨廣東駐師揭陽降土寇金元祐招復循梅惠三州之寇承制官其酋長俾治賊以給兵食又別規粟四千石輸送京師自是英肇欽連諸郡皆附且治兵由梅嶺以圖江西而元祐有異志託以鎮服其土遮道固畱先是制書命劉巨海僉廣東元帥府事未發元祐竊取易其名私畀猶賊劉文遠誘與偕亂事覺文遠伏誅而元祐及

其弟元泰子榮竄匿不獲俄榮率外賊突入奪符信殺官吏多里不花與參政楊泰元等勒兵拒戰而賊來益眾多里不花中鎗創甚其子達蘭不花率麾下力抗死之多里不花被執擁至太平橋罵不絕口遂爲賊殺其妻卜顏氏妾高麗氏在側不去皆遇害其部將哈乞吳普顏阿刺不花台不花等俱戰死

忠義六

元末死節士人并遺老共四傳

顏瑜字德潤兗州曲阜人克國復聖公五十七代孫也以行誼舉教諭至正十八年田豐起山東瑜攜家走鄆城道遇賊裔瑜曰爾書生吾不爾殺可從我見主帥瑜罵曰爾賊何主帥邪賊怒欲殺瑜瑜無懼色復使之寫旗瑜大詬之賊以槍刺瑜至死罵不絕口妻子皆爲所害又有曹彥

可者亳州人會妖盜起里中多田野無賴子目不知書既破毫揭帛於竿皆羣趨彥可家劫之使寫旗迫以刀斧不顧亦見害年七十矣有司具以事聞中書給貲以葬賜諡節愍

喬彝字仲常晉寧人少時高介有名至正十八年汝潁賊黨關先生等由絳州垣曲縣襲晉寧城陷城中死者十二三彝整衣冠聚家人坐井上令妻子婢輩循次投井中而已隨之彝既死賊首王士誠使人卽其家邀致之至則已死矣賊平朝廷贈彝臨汾縣尹諡純潔有汾州張岳起晉寧王佐者皆士人也竝以不屈賊死又有建昌吳德新者工醫畱京師久之嘗往寧夏遇盜見執脅降不屈自投井中猶仰罵賊賊下射矢貫其項罵益力賊怒以長槍刺之

然亦壯其志憐其死曰此真丈夫也以土埋井而去

楊乘字文載濱州渤海人至正初爲介休縣尹民饑散爲盜乘立法招降之累官江浙行省左右司員外郎坐海寇掠漕糧舟免官寓居松江張士誠入平江其徒郭良弼董綬交推之士誠遣張經招乘乘曰良弼綬皆名臣今已失節願欲引我以濟其惡邪且讓經平日讀書云何經俛首不能對乘日與客痛飲竟日不言經急促其行乘整衣冠自經死年六十四

劉鶚字楚奇永豐人累官至翰林修撰少力於學愛孔子富貴如浮雲之語築浮雲書院以教鄉族子弟割田廩養吳澄重之爲序其詩皇慶王子遊淮東董宣慰聞其賢薦於朝充揚州儒學錄泰定乙丑授汴省掌教齊安河南三

書院至正元年擢湖廣儒學提舉時學田若干畝爲有力
所據者三十年鶚首建言臺省盡復其田居未幾擢祕書
監郎與虞集揭傒斯歐陽玄往還唱和其浮雲書院揭記
之歐虞賦之十年擢翰林修撰十二年除江州路總管時
紅巾賊起郡邑瓦解鶚勵精爲恢復計兵威甚振寇莫敢
犯十七年遷廣東廉訪副使十九年奉命鎮韶修城池繕
甲兵二十年擢廣東閩帥其少子運亦以功特加廣東副
元帥二十二年拜行省參政屢卻寇氛民恃爲保障二十
四年韶洞獠作亂鶚分兵討之疏請益師不報而贛寇數
萬猝至父子親冒鋒鏑戰數月兵困城陷運先陳亡鶚
被執幽於嶺之慈雲寺終始罵賊不屈而死粵人爲立憲
節祠所著有惟實集若干卷

史無傳此編劉鶚集者錄其事蹟

元史卷四十九終